

**Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalakkersuisunut kaammattuutigaa nunani avannarlerni killerni oqaatsit siunissaat pillugu suleqatigiinnissaq anguniarlugu pisortatigut oqaloqatigiittarfimmik pilersitsisoqassasoq. Suleqatigiissitamik nunanit ataasiakkaanit aallartitanik inuttalikkamik pilersitsineq alloriarneq siulliusaaq. Nalunaarusiamik nunani ataasiakkaani oqaatsit inissisimanerannik takussutissiiffiusumik siunissamilu periarfissaat pillugu allaaserisanik imaqartumik suliaqarnissaq suleqatigiissitap suliaarissavaa, tamanna pingaartumik qarasaasiarsornikkut ineriartorneq maanna atuuttoq tungavigalugu.**

(Aallartitat siulittaasuat Vivian Motzfeldt)

### **Akissuteqaat**

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

### **Siullermeerneqarnera**

Naalakkersuisut Nunat Avannarliit Killiit Siunnersuisoqatigiiffiata aalajangersagaanur nr. 2/2018-imut isumaqataanissaannut siunnersuummut Naalakkersuisut qujapput.

Nunat Avannarliit Siunnersuisoqatigiivi aalajangersagaq aqutugalugu kalaallit, islandimiut savalimmiormiullu oqaasiisa inissisimanerannut siunissamilu periarfissaannut pingaartitsipput.

Nunat avannarliit nunat akornanni oqaatsit tungaasigut massakkut attaveqaqatigiilluartoqarlunilu suleqatigiilluartoqarmat Naalakkersuisut ilisimatitsissutigissavaat. Suleqatigiinneq suli ilusilersorluarneqanngilaq, kisiannili suliniummiit suliniummut taakkualu aningaasalersornissaannut atorneqarluni. Naalakkersuisut aamma ilisimatitsissutigissavaat kalaallit oqaasiisa atorneqarnerulernissaat anguniarlugu ilaatigut suliniutinik aallartitsisoqareernikuusoq, soorlu MARTHA atuffassissut aallartinneqareersaq aammalu maskiina atorlugu nutserissut pillugu suliniut maanna ingerlanneqartoq.

Soorlu aallartitani siulittaasq Vivian Motzfeldt oqartoq ullut digitalimik atuiffiusut oqaatsinik atuinitsinnut sunniuteqartorujussuupput, tuluillu oqaasii digitalimik atuinermi atorneqartorujussuullutik. Tului oqaasiisa digitalimik atuinermi atorneqarnerujussuat pissutaalluni nunat avannarliit killiit nunat allat assigalugit ulorianartorsiorsinnaapput. Nunat avannarliit akornanni suleqatigiilluni oqaatsit taakkua pingasuusut inissisimanerat pillugu nalunaarusiortoqarnerata ersersissavaa, suliniutit taaneqartut aallartinneqareersut maluginiarneqartullu saniatigut allanik suliniuteqartoqassanersoq.

Oqaatsit aalajangersimasut assigiinngitsorpasuartigut ulorianartorsioartinneqarsinnaapput, ilaatigut inuit qanoq amerlatigisut oqaatsinik atuisuusarnerat, inuusuttut qanoq amerlatigisut oqaatsinik taakkuninnga atuisuunerat, naqitatigut oqaatsit atorneqarnerat, oqaatsit

ilinniartitsissutini atornerarnerat, oqaatsinik atuisut oqaatsit pillugit isummersortarnerat aamma oqaatsinik atuisut oqaatsinut teknologiinik atuisinnaanerit pissutaallutik. Qujanartumillu oqarsinnaavugut kalaallisut oqaatsivut naalackersuinikkut oqaluttuarisaaneq tamakkerlugu pingaartittuarneqarsimmata, tamatumalu kingunerisimallugu oqaatsivut ulorianartorsiortinneqalissagaluarpata sorpassuartigut piareersimagatta. Imaanngilarlu oqaatsivut ulorianartorsiortinneqarsinnaanngitsut. Inuit 50.000-it sinnilaarlugit amerlassusillit oqaasii pigiinnarneqassappata sululuttariaqarpoq. Oqaatsit annaassanngikkaanni ineriartortinneqartuartaqarput. Suliassaneruneranut aamma pequtaavoq, oqaatsit amerlagisassaannngitsut Inuit oqaasiisut tunngaveqarmata.

Digitalikkut massakkut allanngoriartupiloorneq eqqarsaatigalugu oqaatsit taakku pingasuusut inissisimanerat siunissamilu periarfissaat pillugit ilusilersukkamik suleqatigiittoqarsinnaaneranut tunngatillugu Naalackersuisut erseqqissaatigissavaat oqaatsinik teknik aqutigalugu ineriartortitsineq unammillernartoqarsinnaammat. Tamatumunnga pissutaavoq teknologiit atornerqartut oqaatsitsinnut europallu avannaani oqaatsinut atornerqartunut ataatsikkoortillugit atornerqarsinnaaneq ajornerat. Imatut paasillugu; teknologi oqaatsinut ataatsinut ineriartortitaq oqaatsinut allanut nalinginnaasumik atornerqarsinnaaneq ajornera.

Oqaasileriffik Naalackersuisunut ilisimatitsissuteqarsimavoq, Oqaasileriffik Islandimi Savalimmiunilu oqaatsinut oqartussaaffiit peqatigalugit oqaatsit taakua pingasuusut inissisimanerat pillugu suliniummik ataatsimoorussamik aallartitsisimasoq, tassanilu Nunani Avannarlerni Killerni oqaatsit inissisimanerat pillugu saqqummersitamik ineriartortitsinissaq ilusilersuinissarlu suliariniarneqassalluni. Suliniutigineqartup aningaasalersornissaa pillugu peqataasut Nordplus Sprog-imut qinnuteqaatip qanoq angusaqarfijumaarnera utaqqimaarniarpaat.

Nunani Avannarlerni Killerni oqaatsit siunissaat pillugit suleqatigiinnissamut naapittarfeqarsinnaaneq paaserusullugu Naalackersuisut Oqaasileriffimmik oqaloqateqarsimapput, matumanilu suliassami tassani suliassat siunnersuutigineqartut suliarineqassappata aningaasatigut inuttullu nukissanik pisariaqartitsisoqarnerasoq. Oqaasileriffik suliassamik suliaqartoqarniarpat aningaasatigut inunnillu massakkut nukissaqarnani nalileereerpoq, aningaasaliisoqarnianngippallu suliassamik taamaattumik suliaqarnissami suliassat inatsisitigut aalajangersarneqareersut utaqqisikkallarneqarnissaat ilimagisariaqassalluni. Taamaammallu suliassap 2020-mut Aningaasanut Inatsisissamut tunngatillugu isumaqatigiinniarnissanut ilanngunnissaa sulissutiginiarneqarpoq.

Naalackersuisut taamatut oqaaseqarlutik siunnersuut akuerineqassasoq inassutigaa.